



Na osnovu člana 17. tačka 28. Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine“, br: 25/04, 93/05, 48/07, 15/08, 63/23, 9/24 i 50/24), razmatrajući nacrt Zakona o dopunama zakona o međunarodnoj pravnoj pomoći u krivičnim stvarima koji je dostavilo Ministarstvo pravde Bosne i Hercegovine, aktom broj: 08-02-1-2582/26 od 18.03.2026. godine, Visoko sudsko i tužilačko vijeće Bosne i Hercegovine je, na sjednici održanoj 15. aprila 2026. godine, dalo sljedeće

Mišljenje na nacrt Zakona o dopunama zakona o međunarodnoj pravnoj pomoći u krivičnim stvarima

I Visoko sudsko i tužilačko vijeće Bosne i Hercegovine (u daljem tekstu: Vijeće/VSTV BiH) konstatuje da je materija sadržana u nacrtu Zakona o međunarodnoj pravnoj pomoći u krivičnim stvarima od uticaja na pravosuđe u BiH, u smislu člana 17. tačka 28. Zakona o Visokom sudskom i tužilačkom vijeću BiH.

II Vijeće je sa konceptualnog i sadržajnog aspekta razmatralo predloženu normativnu inicijativu te daje sljedeće mišljenje:

- Cijeneci prijedlog u kontekstu onoga što predlagač navodi kao *ratio* dopune (izmjena Zakona o međunarodnoj pravnoj pomoći u krivičnim stvarima kako bi se eksplicitno omogućilo izvršenje stranih zahtjeva za zapljenu i oduzimanje imovine), Vijeće je mišljenja da prijedlog dopune neće ostvariti svrhu i cilj normiranja u kontekstu nalaza Izveštaja Komiteta eksperata za evaluaciju mjera protiv pranja novca i finansiranja terorizma (MONEYVAL) koji ukazuju *nije jasno da li nadležni organi u BiH imaju dovoljno zakonskih ovlaštenja da izvrše nalog za zapljenu na osnovu stranog zahtjeva, odnosno da se čini da formulacija Zakona o međunarodnoj pravnoj pomoći u krivičnim stvarima pruža mogućnost izvršenja samo stranih presuda zatvorskog karaktera, a da posljedično nedostaje poseban postupak za izvršenje presuda o zapljeni i odluka o privremenim mjerama.*
- Vijeće konstatuje da je odredbom člana 62. stav (1) Zakona propisano da će *domaći sud postupiti po molbi države izricanja kazne za izvršenje sudske presude u krivičnim stvarima samo ako je to predviđeno međunarodnim ugovorom i da će izvršiti pravosnažnu presudu u odnosu na sankciju koju je izrekao strani sud, na način da presudom izrekne sankciju prema krivičnom zakonodavstvu Bosne i Hercegovine.* U tom smislu, u odnosu na izvršenje stranih sudskih presuda, Zakon o međunarodnoj pravnoj pomoći u krivičnim stvarima propisuje da nadležni sud postupa po molbi države izricanja kazne na način da presudom izriče sankciju prema domaćem krivičnom zakonodavstvu, dok oduzimanje imovinske koristi pribavljene izvršenim krivičnim djelom nema karakter krivičnopravne sankcije u smislu krivičnog zakonodavstva Bosne i Hercegovine (član 5. KZ BiH; član 41. KZ RS; član 6. KZ FBiH; član 6. KZ BD BiH).

- Vijeće ukazuje da, prema nalazima Izvještaja, do eventualne dileme prilikom postupanja po zahtjevima za međunarodnu pravnu pomoć u smislu zapljene i oduzimanja imovine stečene krivičnim djelom, kod nadležnih domaćih pravosudnih organa može dovesti činjenica da formulacija odredbi iz Zakona o međunarodnoj pravnoj pomoći u krivičnim stvarima, kojima se utvrđuju posebna pravila za postupanje po zahtjevima za priznanje i izvršenje strane sudske odluke, ostavlja dilemu u odnosu na to da li je ovo izvršenje ograničeno na izricanje sankcije prema krivičnom zakonodavstvu Bosne i Hercegovine ili za predmet može imati i oduzimanje imovinske koristi, a ne pitanje pravnog osnova ili postupovnih pravila za oduzimanje imovine, što za predmet ima nacrt dopune Zakona.
- U tom smislu Vijeće iznosi stav da, ukoliko je intencija predlagača da se propis unaprijedi u skladu sa predmetnom preporukom iz Izvještaja MONEYVAL-a, izmjene i dopune propisa bi trebale biti usmjerene na navedeni aspekt otklanjanja dilema u odnosu na domašaj posebnih pravila za priznanje i izvršenje sudske odluke (Glava VI Zakona), uz eventualno dodatno razmatranje postupanja po nalazima Izvještaja i u odnosu na primjenu privremenih mjera zapljene i oduzimanja imovine na osnovu stranog zahtjeva, a u smislu eventualnog regulisanja ograničenja trajanja privremenih mjera ili propisivanja objektivnih kriterijuma za definisanje potrebe za vraćanjem predmeta ili imovine oštećenoj osobi.

Broj: 08-02-1-1305-2/2026

Datum: 15.4.2026. godine



Dostavljeno:

- Ministarstvo pravde BiH;
- a/a.